
ՀԱՏՎԱԾ Ա-ԴՈՅԻ «ԻՄ ՀԻՇՈՂՈՒԹՅՈՒՆՆԵՐԸ» ՀՈՒՇԱԳՐՈՒԹՅՈՒՆԻՑ

Հայ պատմագիտության հանրաճանաչ և միաժամանակ խորհրդային տարիներին սակավ ծանոթ պատմաբան, տնտեսագետ-վիճակագիր Ա-Դոյի (Հովհաննես Տեր-Մարտիրոսյան, 1867-1954 թթ.) հուշերը, որոնք մնացել են անտիպ: Հետազոտողները ծանոթ են հեղինակի մի շարք աշխատությունների¹, սակայն կան նաև անտիպ աշխատություններ, որոնք տարբեր պատճառներով չեն տպագրվել: Ա-Դոն, որպես այդ ամենի անմիջական մասնակից և ակնաստես, հետազոտողի անաչառությամբ արձանագրել ու վերլուծել է նշված ժամանակաշրջանի բարդ ու հակասական իրադարձությունները: Գիտնականը, օգտագործելով իր անձնական խնայողությունները, ոչ միայն ճանապարհորդել է Արևմտյան Հայաստանում, այլև կատարել է արժեքավոր վիճակագրական ուսումնասիրություններ, որոնք առ այսօր չեն կորցրել իրենց գիտական արժեքը: Ա-Դոն ուսումնասիրել ու հայ հասարակայնությանը ներկայացրել է իր ժամանակի հուզող բազմաթիվ հիմնախնդիրներ՝ հեղափոխական շարժումները Ռուսաստանում, հայ եկեղեցական գույքի բռնագրավումը, հայ-թաթարական ընդհարումները, հայերի զանգվածային կոտորածներն ու բռնազաղթը՝ ցեղասպանությունը, 1915 թ. Վանի ինքնապաշտպանությունը, Արամ Մանուկյանի գլխավորությամբ հիմնված Վանի հայկական իշխանությունը, Վանի հայության հուլիսյան (1915 թ.) նահանջ-գաղթը, հայ և ասորի գաղթականության վիճակագրությունը, 1918 թ. Մայիսյան հերոսամարտերը և Հայաստանի Հանրապետության հռչակումն ու խորհրդայնացումը:

Ա-Դոյի հուշերը մեզ է տրամադրել նրա դուստրը՝ տիկին Ադոլյան, որի համար շնորհակալ ենք: Հոդվածի վերնագիրը հեղինակինն է:

ԳԱՄՊԱՐՅԱՆ Ռ. Հ.

ՍԱՀԱԿՅԱՆ Ռ. Օ.

ԳԱՂԹԱԿԱՆՈՒԹՅՈՒՆԸ

Տաճկական բանակը Սարիղամիշի տակ ջարդվեց ու սահմանի այս կողմի հայության գլխի վրա կախված վտանգն անցավ, բայց միա-ժամանակ առաջ եկավ, ցցվեց սահմանի մյուս կողմի հայության գաղթի հոսանքն իր աղետալի վիճակով և օգնության ձեռք հասցնելու հոգսով:

[1914 թ.] դեկտեմբերի կեսերին, երբ տաճկական բանակը հասել էր Արդահան և Սարիղամիշ, ու ռուսական բանակն ամբողջ ճակատով նահանջեց, այդ նահանջող բանակի հետ միասին քանդվեց ու եկավ այն շրջանների ժողովուրդը, որը գտնվում էր ռուսական բանակի գրաված օղակի մեջ:

¹ Ա-Դո, Մակեդոնիա, Մ. Պետերբուրգ, 1903, նույնի՝ Հայրենիքի կարօտը, Մ. Պետերբուրգ, 1905, նույնի՝ Հայ-թուրքական ընդհարումը Գովկասում, Ե., 1907, նույնի՝ Վանի, Բիթլիսի և Էրզրումի վիլայեթները, Ե., 1912, նույնի՝ Մեծ դեպքերը Վասպուրականում 1914-1915 թվականներին, Ե., 1917:

Այդ շրջաններն էին՝ Բասենը, Ալաշկերտը, Ղարաքիլիսան, Դութախը, Դիադինը, Բայազետը (տաճկական)², իսկ Սարայը, Աղբակը, Սալմաստը, Խոյը՝ պարսկական գծերով:

Գաղթականությունը եկավ որպես հեղեղ ու հեղեղեց Կարսի, Կադզվանի, Ալեքսանդրապոլի, Ախալքալաքի, Սուրմալուի, Էջմիածնի, Երևանի և Շարուրի գավառները:

Հարկավոր էր գնալ, տեսնել թշվառության այդ հեղեղը և օգնել որևէ կերպ, և ես գնացի:

Բայազետի, Դիադինի, Դութախի և Ղարաքիլիսայի շրջաններից գաղթողները գալիս էին Իգդիրի գծով՝ ուղղություն ընտրած Էջմիածին ու Երևան: Մարգարա գյուղը հանդիսանում է Արաքսի նորագույն կամրջի կամրջագլուխը և միակ անցքը:

Մարգարայում եմ՝ կամրջի գլխին, դեկտեմբերի վերջին 4-5 օրերն են: Արտասովոր եղանակ է՝ անընդհատ անձրև է տեղում՝ մինչև մարդու ոսկորները թափանցող մանր անձրև, ճանապարհը և գյուղի փողոցները ցեխակոլոլ, ցեխ, որը շատ տեղերում անանցանելի էր ու միանգամայն դժվարին: Լույսը նոր միայն բացվում է: Գալիս են թրջված, ցեխոտված, հոգնած քայլերով, գալիս են գունատ ու հյուծված դեմքերով, գալիս են սայլերի, էշերի, եզների վրա կապոտած երեխաներով, իսկ մեծերը՝ մայրերը ոտով՝ շալակած նվվացող փոքրիկներին ու հաճախ մերկ ոտներով: Մեծերի դեմքերի վրա վիշտն է խոտում, իսկ փոքրերը լացում, հաց են ուզում: Անձրևը չի դադարում, թրջում, թրջում է ամենքին և ամենքն էլ՝ մեծ թե փոքր, մրսում, դողդողում են ու միաձայն մեկ անկյուն խնդրում:

Գալիս է հեղեղն անընդհատ մինչև ուշ գիշեր: Շատերը տեղավորվում են Մարգարայի տներում այն չափով, որքան հնարավոր է, շատերն էլ տեսնելով դրությունը, կանգ չեն առնում, այլ շարունակում են ճանապարհը դեպի Էջմիածին, Երևան, ուշադրություն չդարձնելով ո՛չ անձրևին և ո՛չ էլ ցեխին:

Օրը մթնում է՝ թխպոտ ու մռայլ օրը: Մենք մի քանի հոգի ամբողջ օրը տներ մտնելով, եկողներին տեղավորելով և հոգնել ենք, և սովել, բայց հնարավոր չէ գեթ մի վայրկյան հանգիստ առնել, որովհետև հեղեղը շարունակվում է: Ամենից անտանելին շարունակ տևացող անձրևն է և ցեխը, որը պատել է ամեն ինչ:

Մութը բոլորովին պատել է, շարժումը դադարել ու մեկեն կամրջի կողմից դեպի գյուղն է գլորվում մեկ ֆուրգոն լիքը երեխաներով, որոնց թիվը 40-ից պակաս չի լինի: Մթության մեջ ոչինչ չի երևում: Բերում են մեկ լապտեր, որի մեջ հազիվ առկայծում է ծխացող մի լույս, այդ ծխացող լույսի տակ նշմարվում են փոքրիկ երեխաներ՝ գունատված ու հյուծված դեմքերով: Նրանք թրջված են, սառած ու սոված, մի քանիսը լացում են: Դրանց պետք է տեղավորել, բայց տեղ չկա. գյուղի բոլոր տները բառի իսկական իմաստով բռնված են՝ տեղ չկա, բայց մտատանջությունը, որքան ասեք: Երկար մտածելուց հետո որոշում ենք ֆուրգոնը նույն վիճակում, երեխաներով լիքը թողնել բաց երկնքի և շարունակվող անձրևի տակ, վազ ենք տալիս հացի կետը, վերցնում ենք բավականաչափ հաց ու մեկ մեծ սփռոց, վերադառնում ենք ֆուրգոնի

² 1878 թ. Բեռլինի պայմանագրով Ռուսաստանը Օսմանյան կայսրությանը վերադարձնում է պատերազմի (1877-1878 թթ. ռուս-թուրքական) ընթացքում գրաված Ալաշկերտի հովիտը, բացի Բասենի 40 գյուղերից: Նրանցից կազմվում է վարչական նոր միավոր՝ Կարսի մարզի Կադզվանի օկրուգի Խորասանի տեղամասը, որը նաև կոչվում է «Ռուսական Բասեն»: Օսմանյան կայսրության տիրապետության տակ մնում են Բասենի 98 գյուղեր, որոնք պայմանականորեն անվանում են «Թուրքական կամ Տաճկական Բասեն»:

մոտ, բաժանում էրեխաներին հացը, որը բոլորս էլ երեխաները խլում ու բերաններն են տանում: Միտոցը փռում ենք երեխաների գլխին ու հեռանում:

Պատկերում եմ շատ ուշ: Քուն չկա: Այդ օրվա պատկերներն աչքիցս չեն հեռանում. խղճիս վրա կապար է նստած, ճգնում է:

Այս մի փոքր պատկերն է այն տառապանքի, որ հայ գաղթականությունը կրել էր ճանապարհին ու թողել ճանապարհին սառած շատ երեխաներ ու ծերունիներ:

Ես ապրեցի Մարգարայում վեց օր, և այդ օրերն ինձ համար հանդիսացան հոգեմաշ ապրումների օրեր:

Սակայն այդ հոգեմաշ ապրումների ֆոնի վրա առկայծում էր հուսատու մեկ ցուլ՝ այդ ցուլը վեց օրերի ընթացքում իմ տեսած Մարգարա գյուղի գյուղացիության ցուցաբերած գիտակցությունն ու կարեկցությունն էր՝ հանդեպ աղետների ենթակա իր ցեղակիցների:

Մարգարայի գյուղացիների տան դռները այդ վեց օրերի ընթացքում բաց մնացին գաղթականության առաջ, նրանք ընդունում էին իրենց տներում ցեխոտված ու աղտոտված ընտանիքներ, վառում էին թոնիրները, չորացնում թաց հագուստները, լվանում աղտոտված զգեստները, շատ ընտանիքներ ստեղծում էին նույնիսկ լողանալու հարմարություններ ու հոգում ուտեստը:

Ես տեսա այդ բոլորը մեկ հայ գյուղի միջավայրում ու սփոփանք էի գտնում իմ ծանր ապրումների աշխարհում: Հայ գյուղացին, որը կրել էր շատ հալածանքներ ու ճնշումներ, այնուամենայնիվ պահպանվել է նրա մեջ կարեկցությունը դեպի տանջված մարդը, ահա այն մեծությունը, որ ունի հայ գյուղը:

ԴԻՎԱՅԻՆ ԾՐԱԳԻՐ

Սարիղամիշ՝ Արդահանյան ճակատամարտում կրած խայտառակ պարտությունից հետո, պարտություն, որը կլանեց էնվերյան բանակի տասնյակ լավագույն դիվիզիաներ, տաճիկ կառավարությունը մի պահ գլուխը կորցրեց, ու պարտության պատճառները փնտրելով, նորից կանգ առավ հայ ժողովրդի վրա ու պարտության վրեժն ամբողջովին որոշեց թափել նրա գլխին:

Ճնշումներ և հալածանքներ հայերի նկատմամբ միշտ էլ եղել է, այդ ծայրահեղ չափերի հասավ զորաժողովից անմիջապես հետո, որը գնալով, ինչպես տեսանք, այլանդակ կերպարանք ընդունեց, բայց այդ բավական չհամարվեց, հարկավոր էր ավելին, կտրուկ, վերջնական միջոց:

Ահա այս կերպ դրվեց խնդիրը և որոշվեց.

հայ ժողովրդի բնաջնջումը:

Այս միտքը նոր չէր, նա գալիս էր սուլթան Համիդի³ ժամանակներից, սակայն նոր էր գործի դնելու մեթոդը՝ իրագործելը: Սուլթան Համիդի ձտերը՝ Էնվեր⁴ ու Թալեաթ⁵

³ Աբդուլ Համիդ II (1842-1918), թուրք սուլթան (1876-1909): 1894-1896 թթ. նրա հրամանով կոտորվել են 300 հազար հայեր: Իր դաժանությունների՝ հայ հպատակների զանգվածային կոտորածների համար ստացել է «Կարմիր սուլթան» մականունը:

⁴ Էնվեր փաշա (1881-1922)-թուրք պետական և ռազմական գործիչ: «Միություն և առաջադիմություն» կուսակցության Կենտկոմի անդամ, Օսմանյան Թուրքիայի զինվորական նախարար և զինված ուժերի Գլխավոր շտաբի պետ (1913-1918): Առաջին համաշխարհային պատերազմի տարիներին հայերի ցեղասպանության կազմակերպիչներից և իրականացնողներից մեկը: 1919 թ. օսմանյան Ռազմական աստիճանի կողմ-

փաշաներն իրենց ոճրագործություններով գերազանցեցին իրենց ոճրագործ պապիկին ու որոշեցին կազմակերպել մասսայական ջարդեր:

Վանից հրաման գնաց բոլոր կայսականներին⁶, ապրիլի 6-ին կենտրոնը հավաքել շրջանի բոլոր տղամարդկանց՝ 15 տարեկանից ի վեր անխտիր ու դրանց կենտրոնից նույն գիշերը դուրս տանել, խուս-խուս գնդակահարել ու դիակները թաղել, անհետացնել:

Բնչպես իրագործվեց այս դիվային ծրագիրը:

Սարիղամիշի ճակատամարտից անցել էր ավելի քան երեք ամիս...⁷ սահմանի մյուս կողմից հասնում էին հուզիչ լուրեր, հալածանքը հայերի նկատմամբ հասել էր ծայրահեղության, և ահա ապրիլի 8-ին Դիադինից ստացվեց մեկ հեռագիր, որով հայտնվում էին, որ Դիադին են հասել Արձեշի և Սոսկունի ջարդերից փախած հայեր: Այդ հեռագրից 3-4 օր անց չարագուշակ աղետն արդեն սկսվել է, մոմտացի այդ խոսքերը ու դուրս եկա որոնելու նրանց ու գտա երկուսին: Դրանք երկուսն էլ Արձեշի գավառից էին, մեկը Ականց քաղաքից, իսկ մյուսը Բանոն գյուղից:

Առաջինը զբաղմունքով որմնադիր էր և կոչվում էր Բինաջի Սիմոն, իսկ մյուսը հողագործ էր, որին կոչում էին Ավետի Մկո: Պատմել տվի նրանց առանձին առանձին այն, ինչ որ տեսել էին ու ճաշակել, բնաջնջման մեթոդը նույնն էր, նկարագիրները նման, ուստի կբավականանք միայն մեկի պատմածով՝ Բինաջի Սիմոնի պատմածն այստեղ բերելով. «Ավետումի նախընթաց օրն էր՝ երկուշաբթի: Հանկարծ կառավարության մունետիկը շուկա ելնելով սկսեց հայտարարել, որ 15 տարեկանից վեր բոլոր հայ տղամարդիկ հավաքվեն հյուքմաթը (կառավարության տունը)»: Այս հայտարարության հետ միաժամանակ դուրս եկան ժանդարմները և շրջելով փողոցները, մինչև անգամ մտնելով տները, սկսեցին պատահած հայերին քշել դեպի հյուքմաթ: Դրանց մեջ ընկա նաև ես: Ավետի քան 400 հասակավոր մարդիկ ու երիտասարդներ բերին լցրին հյուքմաթի սենյակներն ու բակը և դռները կողպեցին մեզ վրա: Մի քանի ժամ շարունակ բերում էին ու բերում՝ հասակավոր ու ջահել, հարուստ և աղքատ, քաղաքացի և գյուղացի, և որովհետև այլևս տեղ չկար, ուստի այժմ էլ սկսեցին քշել կշլան (գորանոցը), որը գտնվում էր քաղաքի հարավարևելյան ծայրում: Այնտեղ ավելի տարան, քան մեզ մոտ:

Վարանման ու մտատանջության մեջ մնացինք ամբողջ օրը: Չգիտեինք ինչ է կատարվում դուրսը: Անհամբեր եղած, շարունակ մտածում էինք, թե ինչով կվերջանա

մից հեռակա դատապարտվել է մահապատժի: Սպանվել է Միջին Ասիայում խորհրդային զորքերի դեմ մղված մարտերից մեկի ժամանակ:

⁵ Մեհմեդ Թալեայթ (Թալապթ) փաշա (1874-1921), թուրք պետական գործիչ, Օսմանյան կայսրության ներքին գործերի նախարար (1913-1918), մեծ վեզիր (1917 թ. փետրվարի 4-ից մինչև 1918 թ. փետրվարի 9): Հանդիսացել է «Միություն և առաջադիմություն» կուսակցության ղեկավարներից մեկը: Արևմտահայության զանգվածային բռնազաղթի և ցեղասպանության գլխավոր կազմակերպիչներից մեկը: Պատերազմի ավարտից հետո փախել է Գերմանիա: 1919 թ. թուրքական Ռազմական աստիճանի կողմից հեռակա դատապարտվել է մահվան: 1921 թ. մարտի 15-ին սպանվել է Բեռլինում վրիժառու Սողոմոն Թեհլիրյանի կողմից:

⁶ Գավառապետ:

⁷ Հատվածը դուրս է մնացել պատճենահանումից - ծնթ. խմբ.:

⁸ Տաճկաստանում բանտերը զետեղված են կառավարական տան... (Հատվածը դուրս է մնացել պատճենահանումից: Ծանոթագրությունը Ա-Դոյինն է):

այս բոլորը: Ամեն տեսակ վատ գուշակություններ էինք անում, սակայն չէինք գուշակում այն, ինչ որ տեղի ունեցավ:

Այսպես հազար ու մի մտահոգությունների մեջ իրար վրա թափված, ծարավ ու քաղցած մաշեցինք ամբողջ օրը: Եղավ երեկո, քաղաքը լռեց ու լռեց սովորականից շուտ, որովհետև կարգադրված էր մուրթ պատելուն պես բոլորը տուն քաշվեն:

Եվ մինչդեռ որը գրույցով ու տխուր գուշակություններով զբաղված, և որն էլ մերկ հատակին նստած ննջում էր, հանկարծ դուռը բացվեց, ու շեմքին երևաց բանտապետ Ալի Էֆենդին: Նա դուրս բերեց մեզին 11 հոգու, կողք կողքի շարքով կանգնեցրեց միջանցքում ու բոլորիս թևերը թռկով կապեց միմյանց: Այս շարքի մեջ ընկա և ես: Ապա դուրս բերեց նորից 8 հոգի և նրանց թևերը նույն ձևով կապեց միմյանց: Այսպես վարվեց երրորդ խմբի հետ, որը բաղկացած էր 9 հոգուց: Շարքով կապկպում էին այնքան մարդ, որքան թռկը բավականացնում էր:

Երբ այս գործողությունը վերջացավ, բանտապետը դարձավ սպասող ժանդարմներին՝ թվով 8-10 հոգի և հրամայեց «Բունլարը սիզի թեսլիմ եղդիք, գոթուրյուն կլշա («Սրանց ձեզ եմ հանձնում՝ տարեք գորանոցը»):»:

Կապկպած մարդկանց համարյա բոլորին ճանաչում էի, օրինակ իմ շարքի մեջ էին Վարդան աղան, իր երկու տղաները՝ Գաբրիելն ու Սողոմոնը, Պոյաջյան Պողոս աղան և երկու տղաները՝ Ռուբենն ու Արսենը: Ճանաչում էի նաև մեզ ուղեկցող ժանդարմներին, նրանց մեջ էին Բորյազ Բսոն, Շուքրի օղլի Հեքմաթը և Կուլի օղլի Սուլեյմանը:

Ու այսպես երեք շարք կապկպածներին ժանդարմներն առաջ ձգած քշեցին, սակայն փոխանակ կշյան տանելու մեզ՝ ճանապարհը ծռեցին ու դուրս բերին նավահանգիստ տանող գծի վրա: Մթության մեջ գնում էինք առանց ծպտուն հանելու: Երկյուղն այնպես էր մեզ կոխել, որ ոչ ոք չէր վստահանում⁹ ձայն հանել: Ճանապարհին մեզանից մեկ տղա խնդրեց թևի կապը մի փոքր թեփացնել, որը սաստիկ ցավեցնում էր, բայց ժանդարմներից մեկը հրացանի կոթով այնպիսի մեկ հարված իջեցրեց տղայի թևին, որ նա ցավից ծվվաց ու կախ ընկավ շղթայից:

Քաղաքից դուրս բերելով, քշեցին դեպի Խարկեն գյուղը, որը կես ժամի չափ հեռու էր քաղաքից: Խարկենի տակ մեկ հեղեղատ կար՝ նրա միջով հոսում է մեկ փոքրի առու: Հեղեղատը կոչվում է Դարա Ջամին: Ահա այդտեղ էլ բերին մեզ ժանդարմները: Եվ երբ դեռ նոր տեղ հասած չգիտեինք, թե ինչ պիտի անեն մեզ հետ, հանկարծ ժանդարմները մեկ կողմ քաշվեցին, մեկեն հրացանների բերանն ուղղեցին դեպի մեզ ու տըր-տըր-տըր կրակեցին:

«Վայ զարկվեցի», - բարձրացավ աղեկտուր ճիչերի մեկ ժխոր: Միմյանց փաթաթված, գնդակահար գետին թափվեցինք՝ դիակների կույտեր կազմելով: Մրտամաշ հառաչանքները և գալարուն ոռնոցներն իրար խառնվեցին: Հրացանները որոտացին երրորդ, չորրորդ, հինգերորդ անգամ, ու գնդակներն անհաշիվ թափվում էին գալարվող դիակների մեջ:

Մի քանի րոպե անցավ, հառաչանքներն ու ոռնոցները մեղմվեցին: Մոտեցան ժանդարմները և սկսեցին մեկիկ մեկիկ դիակները շոշափել, ստուգելու համար՝ արդյոք կենդանի մնացածներ չկան: Ես կորցրել էի ինձ, չգիտեի զարկված եմ, թե ոչ: Մեկ կորցնում էի գիտակցությունս ու մեկ էլ ուշքի գալիս: Հանկարծ զգացի, որ թոկն արձակեցին ու թևս ազատվեց: Մեկ էլ ճրագի լույս տեսա: Ժանդարմներից մեկը լուցկին վառում էր ու մոտեցնում ընկածների դեմքերին՝ նրանցից ով կենդանության նշան էր ցույց տալիս, ուղղում էին ճակատին հրացանի բերանը ու կրակում: Այդպես

⁹ Համարձակվում:

մոտենում էին ինձ ...¹⁰: Օ՛հ, ինչ վայրկյան էր այդ, որ ես ապրեցի, տասն անգամ մահանալն ավելի դուրսին էր, քան այդ վայրկյանի ապրումը: Եվ մինչ դեռ թույլ եմ թույլ սպասում էի այդ օրհասական ժամին, հանկարծ մի փոքր հեռու, մեզ վրա կրակելու ձևով տըր-տըր-տըր բացվեցին հրացանները, բարձրացավ աղիտոտ ճիչերի մի ժխոր, ու մեզանով զբաղված ժանդարմները, գնդակահարվելուց վախեցած, թողեցին մեզ ու փախան: Տըր-տըր-տըր, նորից լսվեց հրացանների որոտը: Կրկնվեց մի քանի անգամ նա: Այնտեղ՝ մեզանից մի փոքր հեռու նոր շարքեր էին գլորվում, նոր կյանքեր էին հնձվում, ու մենք մոռացվեցինք:

Ես դեռնա չգիտեի՝ զարկված եմ, թե ոչ: Մի փոքր շարժվեցի, շոշափեցի մարմինս, ոչինչ չկար: Ինձ վրա թափված դիակները պաշտպանել էին իմ կյանքը և իրենց արյունով թրջել իմ հագուստը, որի հետևանքներն ահա այժմ էլ մնում են վրաս:

Առաջին միտքը, որ ծագեց իմ մեջ՝ փախչելու բնագործ էր, բայց ունեցածս ոտնամաններով փախչել չէի կարող, ուստի վայրկենապես արձակեցի սպանվածներից մեկի տրեխները, հագա և շարժվեցի տեղիցս: Օ՛րբան մարդը հնարագետ է մահվան վտանգի ժամին: Գնում էի գնդակի արագությամբ, առանց հետ նայելու, խփում անցնում էի առուներ, դաշտեր, բլուրներ, թողնում էի հետևս ամեն ինչ ու վազում էի, ես էլ չիմանալով թե ուր: Ոչինչ չէի զգում՝ ոչ քաղց, ոչ ծարավ, ոչ հոգնածություն, թեև ամբողջ օրը ոչինչ չէի կերել: Միայն ականջիս հասնում էին հրացանների կրկնվող խուլ որոտները, և քայլերս ավելի ու ավելի էի արագացնում:

Ես քայլեցի ամբողջ գիշեր, ու երբ լույսը բացվեց, ինձ գտա Ալադադի¹¹ ձյունոտ լանջերի վրա: Ահա այստեղ միայն զգացի հոգնածություն, որի նմանը երբեք չէի զգացել: Շրջապատը ծածկված էր ձյունով: Մեկ մեծ քարի տակ միայն սև տեղ գտա ու նստեցի հանգստանալու, բայց երկյուղը նորից պատեց ինձ: Կանգնեցի, չորս կողմս նայեցի ու հանկարծ մի փոքր հեռու քարերի տակ մարդիկ նկատեցի: Մարսափը մի թույլ կոխեց ինձ, սակայն շուտով անցավ՝ նրանք էլ շարժվեցին, ու ես նրանց ճանաչեցի: Նրանք Սոսկուն գյուղից էին՝ թվով 23 հոգի, գյուղի քահանայի հետ միասին: Դրանք, Ականցի կոտորածի լուրն առնելով, ձգել էին գյուղը և փախել:

Ահա այդ 23 հոգու հետ քաղցած և ուժասպառ չափչփեցինք Ալադադի ձյունապատ խորխորատները նորից մեկ օր ու մեկ գիշեր և ապրիլի 8-ին իջանք Դիադին, ուր գտնվում էր ռուսական բանակը:

Մենք այսքանս մեկ հրաշքով փախանք ու ազատվեցինք, բայց Արձեշի մեջ անունը հայ տղամարդ չմնաց բոլորը - բոլորը ընկան, ընկան գնդակահար ու սրախողխող:

Այս էր ահա հայկական ջարդերի ընդհանուր պատկերը, որ տեղի ունեցավ Վանի վիլայեթի բոլոր բնագավառներում միաժամանակ ապրիլի 6-ից սկսած: Սակայն այս դիվային ծրագրի մեկ մասն էր, ապա որն էր ամբողջական ծրագիրը: Ահա այդ հայտնի դարձավ ինձ, երբ Վանն ազատագրվելուց¹² հետո արդեն երկրորդ անգամ ես այցելեցի այդ պատմական քաղաքը:

Մարտ ամսի կեսերին Վանի վալի Ջևդեթը¹³ գտնվում էր Բաշկալեի կողմերում ու դեկավարում էր չեթեական մեկ գունդ: Վանի շրջակա գավառներում տեղի ունեցող արդեն ծայրահեղության հասած բռնությունների և սպանությունների, և անորոշ շրջաններում էլ տեղի ունեցող զինված դիմադրությունների կապակցությամբ Ջևդեթի

¹⁰ Կախման կետերը փաստաթղթինն են:

¹¹ Ծաղկանց լեռներ:

¹² Վանն ազատագրվել է 1915 թ. մայիսի 3-ի լույս 4-ի գիշերը:

¹³ Ջևդեթը մինչև Վանի վալի՝ նահանգապետ նշանակվելը Բաշկալեի կայմա-կամն էր: Նրա կինը Հնվեր փաշայի քույրն էր:

և տաճկական պառլամենտի Վռամյանի¹⁴ մեջ փոխանակվեցին մի քանի ընդարձակ հեռագրեր: Վռամյանը մեղադրում էր գավառական պաշտոնեություններին բռնություններ ու սպանություններ կատարելու մեջ, նախագրուշացնելով, որ դրանցով բացվում է խռովությունների դուռը, իսկ Ջնդեթը մեղադրում էր հայերին ապստամբություններ կազմակերպելու մեջ՝ սպառնալով, որ շուտով ինքը զորքեր վերցրած կվերադառնա Վան և հույս ունի, որ խռովություններին վերջ կդնի:

Եվ իսկապես մարտի 19-ին Ջնդեթը չեթեական համազգեստ հագած ու 600-ից բաղկացած չեթեական զորամասը հետևելով ձգած վերադառնում է Վան, իսկ 3-4 օր անց Վան է հասնում 800 հոգուց բաղկացած հետևակ զորամաս երկու թնդանոթով:

Ջնդեթը բերեց իր հետ մշակված ծրագիր, անշուշտ Պոլսից հրահանգված ու գործի անցավ:

Վանից հետո որպես լավ կազմակերպված շրջան հայտնի էր Շատախի¹⁵, կենտրոն ունենալով Թադը: Այդտեղ որպես կազմակերպող ուժ հանդիսանում էր Հովսեփ Չոլոյանը:

Ծրագրի առաջին մասը կայանում էր նրանում, որ նախ մեջտեղից վերացնեին դեկավար ուժերը, և ահա մարտի 29-ին Շատախում ձերբակալում են Հովսեփ Չոլոյանին ու հինգ աչքի ընկնող երիտասարդների: Երիտասարդները վրդովված պահանջում են տղաներին ազատել՝ պահանջը մերժվում է, և հարաբերությունները խզվում են:

Լուրը երկու կողմից էլ հասնում է Վան: Ջնդեթը իր մոտ է կանչում Վռամյանին և Արամին¹⁶, ու ձևանալով որպես անտեղյակ Շատախի դեպքերի մանրամասնություններին, առաջարկում է երկու կողմերից ազդեցիկ անձերից Շատախ ուղարկել մեկ հանձնաժողով: Վռամյանը և Արամն անտեղյակ Ջնդեթի մտադրություններին, ընդունում են այդ առաջարկը ու տալիս են որպես հեղինակավոր մեկի՝ Բշխանի¹⁷ անունը, որը ճանաչված էր որպես զինվորական ուժ: Ջնդեթն էլ այդ էր ուզում: Համաձայնությունը կայանում է, և ապրիլի 3-ին Բշխանը և երեք աչքի ընկնող

¹⁴ Վռամյան (Դերձակյան Օնիկ, 1870-1915), ազատագրական շարժման գործիչ, ՀՅԴ անդամ: Օսմանյան խորհրդարանի պատգամավոր:

¹⁵ Շատախը գավառակ էր Վանի նահանգում, Արևելյան Տիգրիսի ակունքի շրջանում: Նրա հյուսիսային սահմանը կազմում էր Արտոս լեռը, արևմտյանը՝ Մոկսը, արևելյանը՝ Նորդուզի գավառը: Շատախում հաշվվում էր 110 գյուղ, որից 50-ն էին հայկական: Կենտրոնը Թադն էր, որը բաղկացած 220 տներից: Այն գտնվում էր Միվտկնա և Վերին Տիգրիս գետերի միախառնման և երեք խորունկ ձորերի միացման տեղում: Արևելյան Տիգրիսից ձախ գտնվում էին քրդական, իսկ աջ՝ հայկական գյուղերը: Հայտնի էր օսմանյան բռնապետության դեմ իր ըմբոստություններով, որի համար ստացել էր «Փոքրիկ Ջեթուն» պատվանունը:

¹⁶ Մանուկյան Արամ (Մանուկյան Մարգիս, 1879-1919), հայ ազգային-ազատագրական շարժման, քաղաքական և պետական ակնավոր գործիչ, ՀՅԴ անդամ: 1915 թ. Վանի ինքնապաշտպանության փաստացի ղեկավար, մայիս-հուլիս ամիսներին Վանի ժամանակավոր վարչության կառավարիչ (նահանգապետ), 1917 թ. վերջին Երևանի Հայոց ազգային խորհրդի փաստացի ղեկավար: 1918 թ. Մայիսյան հեղափոխության ժամանակ ապահովել է հայկական զորքերի թիկունքը: 1918 թ. հուլիսի 24-ից՝ Հայաստանի Հանրապետության ներքին գործերի նախարար:

¹⁷ Բշխան (Պողոսյան Նիկոլ, Նիկողայոս, 1883-1915), ազգային-ազատագրական շարժման գործիչ, ՀՅԴ անդամ:

երիտասարդներ¹⁸ մեկ կողմից ու չորս հոգի, այդ թվում Վանի ոստիկանապետ Վաֆիկ Բելը Ջնդեթի կողմից՝ ութ հոգի, բոլորն էլ զինված ճանապարհ են ընկնում դեպի Շատախ:

Այս ծրագրված խուլքը հանգիստ է առնում Հայոց ձորի Հիրձ¹⁹ գյուղում, և այդտեղ էլ որոշվում է գիշերել, սակայն դեռ քուն չեղած, այն պահին, երբ Բշխանն իր ընկերներով հատկացված սենյակում գրույցով են զբաղված լինում, մեկեն ներս են թափվում Վանից հետապնդած տաս չերքեզները և խմբային հրացանային կրակոցներով չորսին էլ տեղնուտեղը սպանում:

Այս դեպքի հաջորդ օրը՝ ապրիլի 4-ի առավոտյան, արդեն տեղեկացված Ջնդեթն առանձին-առանձին տարբեր հեռախոսներով իր մոտ է կանչում Վռամյանին, Արամին ու Բուլդարացի Գրիգորին²⁰: Դեռևս չստուգված միմիայն շշուկներ առնելով Վռամյանը գնում է, թողնելով Արամին տոմսակ, որ նա չգնա: Վռամյանը գնում է և չի վերադառնում, և մինչև այդ Արամն ու Գրիգորը զգուշացված են՝ չեն գնում դեպի Ջնդեթը և փրկվում են:

Ապրիլի 4-ի երեկոյան արդեն հայտնի է դառնում դավադրությունն ամբողջովին, 5-ի առավոտը բացվում է լարված վիճակում: Այդ ու հաջորդ ապրիլի 5-ի օրը քաղաքը վեր է ածվում պայքարի պատրաստվող բանակի, իսկ ապրիլի 7-ին քաղաք եկող երկու հայ կանանց միլիսնների²¹ կողմից վիրավորանք հասցվելու ու մոտակա հայ դիրքից այդ միլիսնների վրա բացվող կրակոցներով բռնկվում է ընդհարումը²² մեկեն, ու Վանն իր երկու քաղաքամասերով դառնում է կատարյալ պատերազմի դաշտ²³:

¹⁸ Այդ երիտասարդներն էին՝ Պողոս Թուրունջյանը (մականունը Քոթոթ), Վահան Խոսնայանը և Միհրան Տեր-Մարգարյանը:

¹⁹ Հիրձում բնակվում էին 30 տուն հայեր և 70 տուն քրդեր: Պատգամավորներն իջևանել էին Քյարիմ աղա Ռաշիդի տանը:

²⁰ Բուլդարացի Գրիգոր (Գեզյան, Քոթեյան Գրիգոր). - ազատագրական շարժման գործիչ: 1915 թ. Վանի Այգեստան թաղամասի ինքնապաշտպանության մարմնի անդամ: 1917 թ. կազմված Վասպուրականի հայկական իշխանությունում զբաղեցրել է զինվորական գործերի վարիչի պաշտոնը:

²¹ Միլիս՝ մահմեդական բնակչությունից կազմված զորաջոկատի անդամ:

²² Բնակչությանը սպառնացող վտանգը հարկադրում է Վանի հայությանը դիմել արտակարգ միջոցների: Ապրիլի 5-ին քաղաքի առավել հայափռ թաղամասում՝ Այգեստանում, կազմակերպվում է «Վանի ինքնապաշտպանության զինվորական մարմին», կարձ՝ Զինվորական մարմին: Նրա անդամներն էին Արմենակ Եկարյանը (զինվորական ղեկավար), Կայծակ Առաքելը, Բուլդարացի Գրիգորը, Փանոս Թերլեմեզյանը, Ա. Մանուկյանը և ուրիշներ: Ինքնապաշտպանության իրական ղեկավարը և ոգին էր Ա. Մանուկյանը: Ապրիլի 7-ին թուրք զինվորները հարձակվում են քաղաքի մոտ գտնվող Շուշանց գյուղից Վան վերադարձող մի խումբ հայ կանանց վրա: Եղիա Նախշունյանը և Հակոբ Տիվիրգյանը միջամտում են՝ ցանկանալով պաշտպանել կանանց: Թուրքերը անսպասելի կրակ են բացում: Դրանից հետո սկսում է փոխհրաձգությունը և Վանի հերոսական ինքնապաշտպանությունը:

²³ 1914 թ. սկզբներին Վանում բնակիչների թիվը 41 հազար էր, որոնցից մոտ 23 հազարը հայ, իսկ 18 հազարը՝ մահմեդական: Քաղաքը բաղկացած էր Այգեստան ու Քաղաքամեջ կոչվող թաղամասերից, որոնց միջև ընկած տարածքում բնակվում էին թուրքեր: Քաղաքամեջի ինքնապաշտպանությունը ղեկավարելու համար կազմվում է Զինվորական մարմին: Նրա անդամներն էին Հայկակ Կոստյանը (ղեկավար), Լևոն

Ընդհարումը բռնկվում է նաև Շատախում, և բռնկվում է ավելի շուտ, քան Վանի բռնկումը: Չոլոյանի և նրա ընկերների բանտարկման հետևանքով ծագած լարվածությունը շարունակվում է մինչև ապրիլի 4-ը: Շատախ է հասնում Բշխանի սպանության լուրը: Համբերության բաժակը լցվում է: Ահա այդ օրը մեկ միլիս գալիս է հայկական մեկ դիրքի մոտով անցնելու, այդ դիրքի պահակը պահանջում է միլիսից ետ դառնալ՝ միլիսը մերժում է վերադառնալ: Պահակը երկրորդ անգամ կրկնում է պահանջը, բայց միլիսը համառում է, և ահա պահակը վայր է բերում ուսից հրացանը ու կրակում: Միլիսը վայր է գլորվում, իսկ կրակոցին մեկեն արձագանքում են դիրքերը երկու կողմերից, ու կռիվը սկսվում է:

Այսպիսով Ջնդեթի դիվային ծրագիրը եթե իրագործվեց շրջաններում ու տասնյակ հազարավոր մարդիկ զոհ գնացին նրա լարած որոգայթներին, ապա նրա ծրագիրը վիժեց իր Ջնդեթի քթի տակ՝ Վանն ու Շատախը ոչ միայն ջարդերի չենթարկվեցին, այլ ընդհակառակը հանդես եկան որպես պայքարող ժողովուրդ, և մեկ ամիս անհավասար պայքարը պատվով տանելուց հետո Ջնդեթը բռնեց խայտառակ փախուստի ուղին: